

Plenchi

Bèl a bati

TRINGG TRINGGG bèlèm..... TRINGG TRINGGG bèlèm.....

Un felis dia pa bo i bon bini riba nos plenchi. Plenchi ta habri e siman aki atrobe pa asina nos por sosialisá. Tin proyektonan masha interesante den nos skolnan i awe nos ke dunabu un ñapa. St. Paulus VSBO ta trahando duru riba un proyekto pa traha riba e mucha den su totalidat. Ku entusiasmo e skol ta trahandó pa asina yuda kada mucha logra na metanan.

Nos a drenta e trimester ultimo di skol. Ya eksamen sentral di práktika ta tumando lugá den nos skolnan di VSBO. Den mei ta kuminsá e eksamennan téoriko. Efo ku ta e tuts pa pasa di skol di fundeshi bai skol avansá, ta planiá pa kuminsá otro siman.

Mayoria skol su pruebanan ta kuminsá kuminsamentu di yuni, paso kòrda ku skol no ta sera fin di yuni mas. E ta sera den yuli. Esei kier men ku tur skol tin ku adaptá nan planning pa kumpli ku e fechanan nobo. Skol a kuminsá mas lat den ougustus i ta kaba mas lat, pues mester plania tambe pa tur mucha haña suficiente lès promé ku sera e aña. E muchanan ku ta pasa EFO ta keda despues di EFO bin skol normal. Kòrda ku EFO ta duna tuts pa papiamentu, hulandes i aritmetika. Pero pa e mucha por drenta skol avansá e mester tin un bon dominio tambe di abilitatnan manera: debatí, argumentá, traha un resumen. Forma opinion. Esei ta abilitatnan ku nan tin ku konsentrá mas riba dje despues di EFO. Masha dia no ta konosementu so pero ta e abilitatnan aki ta pone tambe ku e mucha por logra su metanan.

Tambe ta importante pa nan haña un formashon riba tópikonan manera seksualidat, preshon di grupo. Komuniká i su reglanan. Etika di komportashon. Kon kumindá, kon duna remarke na un manera aseptabel. Kon bisti pa kua okashon. Droga i su konsekuensianan etc. Skolnan tur ta bai hinka un programa den otro pa asina e hóbennan aki ta drenta mihó prepará den skol avansá, ku tantu konosementu i abilitat pa por defendé nan mes.

Un felis wikent pa bo.

Riba roster

There's a new WHOLE SCHOOL on the Block

St. Paulus VSBO/AGO ta orguyoso di ta e promé skol na Kòrsou ku tin e aserkamentu WSCC, (Whole School, Whole Community, Whole Child)

Resientemente St. Paulus VSBO/AGO a selebrá inisio ofisial di nan programa di inovashon den enseñansa “There’s a Whole New School on the Block” (Tin un skol hèvi den besindario). E programa akí ta bai sòru pa di un manera integral i inovativo e skol prepará su studiantenan riba un eksistensia independiente den komunidad. Den e programa St. Paulus ta deskribí riba kua forma e skol ta bai realisá e renobashon di enseñansa sigun e konsepto “WSSC” pa e próksimo 3 añanan.

E inisio ofisial di e programa di inovashon den enseñansa a tuma lugá dia 15 di mart último ku un presentashon dinámiko den sala di dosentenan di St. Paulus, kaminda tur e personal tabata envolví. E presentashon tabata resultado di dos luna di trabou intensivo pa traha i pensa riba otro formanan di enseñansa kaminda no solamente e enfoke ta riba siñamentu den klas, pero tambe un aserkamentu amplio kaminda e estudiante ta pará sentral. Direktiva di Skolnan Katóliko a fasilítá St. Paulus VSBO/AGO pa nan, komo skol piloto, implementá e konsepto di WSSC.

Durante e presentashon, speshalmente pa representantenan di Direktiva di Skolnan Katóliko, den presensia di sra. Magda Rafael, sra. Petra Suiskens i sra. Sonaida Yzer, direktor di St. Paulus VSBO/AGO, sr. Haymond Kerindongo, a duna un introdukshon di e programa di inovashon den enseñansa “WSSC”.

Sr. Kerindongo a splika kon a yega na e método pa WSSC i a amplia tokante kiko e plan ta para p’e. “St. Paulus, ta pará meskos ku otro skolnan dilanti un reto pa laga su studiantenan desaroyá nan abilidadnan i kompetensianan ku tin mester pa funshoná di forma efisiente den e sosiedat di konosementu, esta ‘21st century skills’. Den siglo 21 hóbennan tin mester di otro abilidad kompará ku 20/30 aña pasá pa ta (ekonómikamente) ábil den un mundu kompleho i di kambio lihé”.

Direktor athunto di St. Paulus VSBO/AGO, sra. Hilly Buitenweg, tambe a dirigí su mes na tur presente. El a amplia profundamente riba e diferente aspektonan di e “Whole School Approach” i a konta entusiasamá tokante e diferente aktividadnan ku e skol ta implementá aktualmente. El a indiká ku St. Paulus no ta kuminsá kompletamente for di sero, ya tin un trayectoria di trabou hasí kaba. E aserkamentu akí ta un kombinashon di inisiativanan, akshonnan i medidanan ku tin komo meta pa mehorá e kalidat di e ambiente di skol na bienestar di e studiantenan. Direktor athunto a sigui enfatisá ku ta

importante ku tin partisipashon di TUR miembro di e “famia di skol”, inkluso e mayornan i otro partidonan. Bario tambe ta hunga un ròl importante den esaki.

“Whole School Approach” ta un aserkamentu den enseñansa ku a bini for di Merka, kaminda ya a kosechá basta éksito. E aserkamentu ta konsistí di e komponentenan **salú, seguridat, envolvimentu, apoyo i desafío**; komponentenan ku skolnan tin mester pa di un manera efektivu i duradero, prepará e studiantenan pa un porvenir ku nan por ta bon formá i tin e abilidadat pa nan mes por yuda nan kurpa.

Na final di e presentashon, representante di Direktiva di Skolnan Katóliko sra. Petra Suiskens a hasi uso di oportunidat pa gradisí e direktiva/gerensia i tur dosente di St. Paulus ku a traha na e proyekto. El a keda impreshoná di e trabounan ku a keda ehersé dor di e tim di maneho, e tim di kuido i e tim di dosente di St. Paulus ku huntu lo forma parti di e aserkamentu akí pa e próksimo 3 añanan.

Pa mas informashon tokante e “Whole School Approach” di St. Paulus VSBO/AGO, por tuma kontakto ku e direktor sr. Haymond Kerindongo.





Not'é riba bòrchi

Kòrsou presente na NCEA 2018 na Cincinnati Merka

Durante di e siman ku tras di lomba un delegashon di Skolnan Katóliko di Kòrsou a partisipá na e konferensia di NCEA na Cincinnati Merka. NCEA ta para pa National Catholic Educational Assosiasion kual ta un organisashon di edukadó i lidernan den enseñansa katóliko na Estádos Unídos. Tur aña e organisashon aki ta tene un konferensia pa tur persona ku ta traha o ta envolví di un òf otro manera ku enseñansa katóliko rònt Merka. NCEA tin tambe diferente skolnan katóliko di rònt mundu komo miembro. Pa direktiva di skolnan katóliko e konferensia aki ta di sumo importansia ya ku su personal ku partisipá na e konferensia ta haña hopi informashon ku ta relevante pa nan funshonamentu komo dosente i lidernan katóliko. E konferensia ta permití nos dosentenan tuma nota di desaroyonan, konseptonan nobo relashoná ku e aspekto di religion katóliko pa nan por inklui esaki den nan lèsnan. Pero tambe tin difrente informashon riba inovashonnan riba tereno di ensenansa i edukashon. Aparte di esaki partisipantenan ta haña e oportunitat pa topa ku koleganan di otro paisnan i

asina entrekambiá opinion i eksperensia riba tur loke ta trata edukashon i enseñansa den skolnan katóliko.

E aña aki hopi énfasis a wòrdu pone tantu riba e mucha i e mayor di e milenio nobo. Kon bo tin ku aserka e mucha i e mayor i tambe Kiko por ta métonan interesante ku por wòrdu usa pa asina aserka tantu mucha i mayor no solamente riba e parti didáktiko pero tambe riba e parti spiritual. E konferensia a tira su lus tambe riba e identidat katóliko i e ròl determinante di e maestro katóliko den esaki.

Pa duna importansia na e responsabilidat aki di Iglesia Katóliko, Su Eminensia Kardinal Guiseppe Versaldi, Prefekto di Kongregashon pa Edukashon Katolika ku sede na Vatikano, a hasi akto di presensia na nòmber di Papa Francisco. E partisipantenan a keda sendé sendé despues di e konferensha inspirativo aki.





Den agènda

Dianan liber

Koningsdag 27 april (liber nashonal)

Dia di obrero 1 mei (liber nashonal)


Hemelvaartsvakantie 10 (liber nashonal) i 11 mei

Dia di bandera 2 juli (liber nashonal)

Fakansi grandi 9 juli t/m 14 ougustus.

Mi ta konta

Bo por skohe pa sigui drumi of lanta i realisá bo soño.



Mucha djispou

Luna: "Kuantu aña bo tin solo

Solo: "Mi ta mes grandi ku bo"

Luna: "Kon por ta ku abo ainda no mag sali anochi bo so anto?"